



Imigassaarniarnerup pisiniarfinit avissaartillugu immikkut imigassaarniarfeqalernissaa pillugu apequteqaat aallaavigalugu oqallinnissamik siunnersuut.

(Inatsisartunut ilaasortaq Charlotte Pike, Inuit Ataqatigiit)

Inuit Ataqatigiinnut siunnersuummut qujanaq.

Isertuussaagunangilaq, Inuit Ataqatigiit piumammassuk, pisortat annertuumik pissaaneqassasut, aammalu innuttaasut inuunerat sapinngisamik killilersorneqassasoq.

Kingullermik Inuit Ataqatigiit pissaanermik tigumminnimmata inuusuttut 18-nit inorlugit ukiullit café-ni nal. 20 kingorna kaffisorsinnaanerat inerteqqutigineqalerpoq. Taamaaliortoqarpoq pisiniarfinni saagulersuinnikkut, imigassat pisiniartartunut ersigunnaarsillugit.

Qujanartumilli Demokraatit suliniutit taakku allanngortippaat, akerlianillu innuttaasut kiffaangissuseqalersillugit innuttaasunullu tatiginninnertik takutillugu.

Maanna Inuit Ataqatigiit kiffaangissusaannik innarliissutaasinnaasumik nutaamik isumassarsipput. Partiip immikkut ittunik imigassanik tuniniaaffinnik pilersitsinialerput. Apererusulerpunga allanik aamma pisiassanik, Inuit Ataqatigiit isumaqarnersut, uagut kalaallit ima inersimangitsiginersugut pisinissatsinnut? Tupanik immikkut ittunik tuniniaaffeqassava? Mamakujuttunut sodavandinullu immikkut ittunik tuniniaaffeqassava?

Demokraatit innuttaasut tatigisorujussuaat. Isumaqarpugut, innuttaasut sapinngisaq tamaat kiffaangissuseqassasut. Tamanna nakkutiginninniarnermik takutitsineruvoq, qinikkat tungaanniit innuttaasut ulluinnarni inuunerannut naalakkisaartitsiniarsarineramik kissaateqarnertut.

Allatut oqaatigalugu; isuma taanna ajorpoq aammalu Demokraatit tapersernaviangilluinnarpaat.

Tassalu Demokraatit oqallinnermut isummersuutigigallagaat.